

Ist das möglich: Von Insel zu Insel in zwei Stunden?

Räödsel: Wat is muorn 33-maol raud un daovan 11-maol rund?

Geographie is, sowied ik weet, en Schoolfak, wat viële nich müegt, ansunners de, we kinen behölligen Kop häbt; un doch wil ik't riskeren un fraogen Ju: Wuviële düüdske Inseln gif't so praeter propter in de Nordsee? . . . Wan Ji sägt: „So tüsken 12 un 15“, sal de Juffer orre de Halläär wul sägen: „Guöd uppast“. De viëlen Halligen draf m' drbi apat nich medriäken. Un wann Ji dan no de Namens uptellen küent van Sylt üöwer Helgoland bes Borkum, is Ju 'ne „1“ up dat naichste Tüügnis siëker. Män dat aals in twee Stunnen? Söws in'n Flaiger wul unmüeglik. 'tschülligung, dat ik Ju en lük up en schewen Pad bracht häf. Van düsse Inseln möch ik nämliks vanmuorn gar nich küern, sunnern van iälf Filt-Inseln, we muorn Naomdag unner dat Motto „Der Mensch ist eine Insel“ van Klok drei bes Klok fief in de Binnenstad medeens uut dat städske Hüse-Meer upduukt un hernoher jüst so wier



Foto: Sophia Demming

unnergaoet. To düsse Inseln häört twee Lüü, we – äs Iäre Majestäät Corona vüörschriif – raude Masken orre, wu dat moderne platdüüdske Word daoför lüt, Snutenpullis driägt. De ene Persoon van de twee nimp de Maske af un stait of sit of wegt sik up düt raud-runne Flak hen un hiär orre in'n Krink un spräk, reziteert, vertelt, kritiseert, dräg butenkops vüör, singt, mäk Musik, un de annere stait daotiëgen un päs up, dat nümsnich naiger harankümp äs de annerthalf Meters, to de Küenigin Corona Verlöf giëwen häf, un dat alle

tiëgensidig sik an den naidigen Abstand holt. De Solo-Vüördrag sal höchstens 'ne Veerdelstunne duern; dan müetet de „Insulaners“, so wil et de Regie, widertreken to de naichste Stiär, dat auk annere dat lütke Program genaiten küent. Wao de enkelten Inseln akraot ligget, wil'k hier nich verraoden, blaots so viël: Wegt Ju nich alto wied van't Zentrum weg, dan häbt Ji 'ne guëde Chance, en paar „Insulaners“ in de Möte to kuomen. Of nu de Mensk 'ne Insel is un altied för sik bliwen mot, orre of aals med aals to doon häf, ümdat alle Inseln unner Water bes up den Grund gaot, dat to interpreteren lig bi Ju. Vlicht seit wi us muorn, natürlich blaots bi pössig Wiär. Ik sin dao.

Hannes Demming
wn.de/plattdeutsch

Wörde

Filt – Filz
Flak – Fläche